



Долоо хоног тутмын хэвлэл
2015 оны 09 дүгээр сарын 28
№36 /897/

ТӨРИЙН МЭДЭЭЛЭЛ

МОНГОЛ УЛСЫН ИХ ХУРЛЫН АЛБАН МЭДЭЭЛЭЛ

**Монгол Улсын
Засгийн газрын
тогтоол**

1721

**Монгол Улсын
Засгийн газрын
тогтоол**

1727

Журам батлах тухай

Стратеги батлах тухай





ГАРЧИГ

МОНГОЛ УЛСЫН ЗАСГИЙН ГАЗРЫН ТОГТООЛ

448.	Журам батлах тухай	Дугаар 267	1721
449.	Стратеги батлах тухай	Дугаар 298	1727

МОНГОЛ УЛСЫН ЗАСГИЙН ГАЗРЫН ТОГТООЛ

2015 оны 6 дугаар сарын 29-ний өдөр
Дугаар 267
Улаанбаатар хот

Журам батлах тухай

Инновацийн тухай хуулийн 27.1-д заасныг үндэслэн Монгол Улсын Засгийн газраас ТОГТООХ нь:

1. "Улсын төсвийн санхүүжилтээр гүйцэтгэсэн эрдэм шинжилгээний ажлын үр дүнд бий болсон оюуны өмчийг өмчлүүлэх, эзэмшүүлэх журам"-ыг хавсралт ёсоор баталсугай.

2. Энэ журмын хэрэгжилтэд хяналт тавьж ажиллахыг Боловсрол, соёл, шинжлэх ухааны сайд Л.Гантөмөрт үүрэг болгосугай.

**МОНГОЛ УЛСЫН
ЕРӨНХИЙ САЙД**

Ч.САЙХАНБИЛЭГ

**БОЛОВСРОЛ, СОЁЛ,
ШИНЖЛЭХ УХААНЫ САЙД**

Л.ГАНТӨМӨР

Засгийн газрын 2015 оны 267 дугаар
тогтоолын хавсралт

**УЛСЫН ТӨСВИЙН САНХҮҮЖИЛТЭЭР ГҮЙЦЭТГЭСЭН
ЭРДЭМ ШИНЖИЛГЭЭ, ТУРШИЛТ, ЗОХИОН БҮТЭЭХ
АЖЛЫН ҮР ДҮНД БИЙ БОЛСОН ОЮУНЫ ӨМЧИЙГ
ӨМЧЛҮҮЛЭХ, ЭЗЭМШҮҮЛЭХ ЖУРАМ**

Нэг. Нийтлэг зүйл

1.1. Энэхүү журмаар улсын төсвийн санхүүжилтээр гүйцэтгэсэн эрдэм шинжилгээ, туршилт, зохион бүтээх ажлын явцад бий болсон оюуны өмчийг өмчлүүлэх, эзэмшүүлэхтэй холбогдон үүсэх харилцааг зохицуулна.



1.2. Улсын төсвийн санхүүжилтээр гүйцэтгэсэн эрдэм шинжилгээ, туршилт, зохион бүтээх ажлын явцад бий болсон оюуны өмчийг өмчлүүлэх, эзэмшүүлэх үйл ажиллагаанд инновацийн тухай хууль тогтоомж болон энэхүү журмыг мөрдөнө.

1.3. Улсын төсвийн санхүүжилтээс бусад хөрөнгөөр гүйцэтгэсэн эрдэм шинжилгээ, туршилт, зохион бүтээх ажлын явцад бий болсон оюуны өмчийг өмчлүүлэх, эзэмшүүлэхтэй холбогдох харилцаанд энэ журам үйлчлэхгүй.

Хоёр. Нэр томъёоны тодорхойлолт

2.1. Энэ журамд хэрэглэсэн дараах нэр томъёог дор дурдсан утгаар ойлгоно:

2.1.1. “улсын төсвийн санхүүжилт” гэж эрдэм шинжилгээ, туршилт, зохион бүтээх ажлыг гүйцэтгэхэд зарцуулсан улсын төсөв болон улсын төсөвт байгууллагын авсан зээл, тусламж, хандивын хөрөнгийг;

2.1.2. “шинжлэх ухаан, технологийн төсөл” (цаашид “төсөл” гэх) гэж Шинжлэх ухаан, технологийн тухай хуулийн 3.1.8-д заасныг;

2.1.3. “шинжлэх ухаан, технологийн төсөл хэрэгжүүлэх, санхүүжүүлэх гэрээ” (цаашид “төслийн гэрээ” гэх) гэж эрдэм шинжилгээ, туршилт, зохион бүтээх ажил хэрэгжүүлэхээр төслийн гүйцэтгэгчээс захиалагч, санхүүжүүлэгч байгууллагатай байгуулсан баримт бичгийг;

2.1.4. “захиалагч” гэж улсын төсвийн санхүүжилтээр гүйцэтгэх эрдэм шинжилгээ, туршилт, зохион бүтээх ажлыг захиалсан төсвийн байгууллага, төрийн өмчит хуулийн этгээдийг;

2.1.5. “гүйцэтгэгч” гэж эрдэм шинжилгээ, туршилт, зохион бүтээх ажлыг хэрэгжүүлэхээр захиалагчтай төслийн гэрээ байгуулсан судалгаа, эрдэм шинжилгээний ажилтан, иргэн, хуулийн этгээдийг;

2.1.6. “оюуны өмч” гэж Патентийн тухай хууль, Зохиогчийн эрх болон түүнд хамаарах эрхийн тухай хууль, Барааны тэмдэг, газар зүйн заалтын тухай хуульд заасан оюуны бүтээл болон хүн, мал, амьтны эмчилгээ, оношилгооны арга, селекцийн дэвшилтэт үр дүн, программ хангамж, интеграл микросхемийн зураглал, ноу-хау, зураг, тайлан зэргийг;

2.1.7. “роялти” гэж Инновацийн тухай хуулийн 3.1.10-т заасныг;



2.1.8. “лиценз” гэж Патентийн тухай хуулийн 3.1.13-т заасныг;

2.1.9. “албадан лиценз” гэж Патентийн тухай хуулийн 3.1.15-д заасныг.

Гурав. Оюуны өмчийн удирдлага, зохион байгуулалт

3.1. Шинжлэх ухаан, технологийн асуудал эрхэлсэн төрийн захиргааны төв байгууллага нь төсөл хэрэгжүүлсний үр дүнд бий болсон оюуны өмчийн талаар мэдээллийн сан бүрдүүлж, оюуны өмчийг өмчлөх, эзэмших, ашиглах байдалд хяналт тавина.

3.2. Салбар шинжлэх ухааны чиглэлээр хэрэгжсэн төслийн явцад бий болсон оюуны өмчийг өмчлүүлэх, эзэмшүүлэх, ашиглуулах шийдвэрийг тухайн асуудлыг эрхэлсэн төрийн захиргааны төв байгууллагын Шинжлэх ухаан, технологийн зөвлөл гаргана.

3.3. Эрдэм шинжилгээний байгууллага нь оюуны өмчийн талаар баримтлах бодлоготой байна. Оюуны өмчийг өмчлүүлэх, эзэмшүүлэх, ашиглуулах асуудлыг уг бодлогын хүрээнд Эрдмийн зөвлөл нь шийдвэрлэнэ.

3.4. Шинжлэх ухаан, технологийн асуудал эрхэлсэн төрийн захиргааны төв байгууллага нь тухайн жилд улсын төсвийн санхүүжилтээр шинээр гүйцэтгэх төслийн хүрээнд бий болох оюуны өмчийг өмчлүүлэх, эзэмшүүлэх холбогдох зохицуулалтыг энэхүү журмын 4.1-д заасан гэрээнд тусгуулах асуудлыг хариуцан зохион байгуулна.

Дөрөв. Оюуны өмчийг баталгаажуулах, бүртгэх

4.1. Улсын төсвийн санхүүжилтээр хэрэгжүүлэх төслийг гүйцэтгэгч нь захиалагчтай байгуулсан гэрээний үндсэн дээр гүйцэтгэнэ.

4.2. Энэ журмын 4.1-д заасан гэрээнд төслийг хэрэгжүүлэх хугацаа, нөхцөл, зардал, хүрэх үр дүн, оюуны өмч, түүнийг эзэмших, ашиглах, баталгаажуулах нөхцөл, оюуны өмчийг ашиглахыг хориглох нөхцөл, журам, лицензийн нөхцөлөөр ашиглуулах болон талуудын хооронд тохирсон бусад асуудлыг тусгана.

4.3. Гүйцэтгэгч нь төслийн үр дүнг захиалагчид хүлээлгэн өгснөөс хойш 6 сарын дотор оюуны өмчид эрхийн хамгаалалт хийлгэх мэдүүлгийг зохих журмын дагуу оюуны өмчийн байгууллагад гаргана.

4.4. Энэ журмын 4.3-т заасан хугацаанд мэдүүлэг гаргах шаардлагагүй гэж эрдэм шинжилгээний байгууллагын Эрдмийн зөвлөл



шийдвэрлэсэн тохиолдолд энэ тухай саналаа мөн журмын 4.3-т заасан хугацаа дуусахаас 3-аас доошгүй сарын өмнө тухайн салбарын төрийн захиргааны төв байгууллагын Шинжлэх ухаан, технологийн зөвлөлд хүргүүлнэ.

4.5. Шинжлэх ухаан, технологийн зөвлөл нь энэхүү журмын 4.4-т заасан саналыг хүлээн авснаас хойш 14 хоногийн дотор уг саналыг судалж, тухайн оюуны өмчийг цаашид хэрхэн ашиглах тухай шийдвэр гарган Эрдмийн зөвлөлд хүргүүлнэ.

4.6. Захиалагч нь оюуны өмчийг байгууллагын нягтлан бодох бүртгэлийн холбогдох дансанд олон улсын ангилал, стандартын дагуу нэр, төрлөөр нь бүртгэж элэгдэл, хорогдлыг тооцно.

Тав. Оюуны өмчийг эзэмших, өмчлөх нөхцөл

5.1. Улсын төсвийн санхүүжилтээр гүйцэтгэсэн эрдэм шинжилгээ, туршилт, зохион бүтээх ажлын үр дүнд бий болсон шинэ бүтээл, бүтээгдэхүүний загвар, ашигтай загвар, барааны тэмдэг, газар зүйн заалт, зохиогчийн эрх болон түүнд хамаарах бүтээлийг гүйцэтгэгчид эзэмшүүлж, өмчлүүлж болно.

5.2. Энэ журмын 5.1-д зааснаас бусад үр дүн буюу оюуны өмчтэй холбогдох тайлан, зураг, программ хангамж, интеграл микросхемийн зураглал, ноу-хау зэргийг төслийн захиалагч эзэмшиж, ашиглана.

5.3. Иргэн, аж ахуйн нэгжийн улсын төсвийн хөрөнгөөр гүйцэтгэсэн төслийн хүрээнд бий болсон оюуны өмчийг эзэмшүүлж, өмчлүүлэхэд энэхүү журмын 5.1-д заасныг баримталж болох бөгөөд эзэмшиж, ашиглахад энэ журмыг мөрдөнө.

5.4. Энэ журмын 5.3-т заасны дагуу төслийг гүйцэтгэсэн иргэн, аж ахуй нэгж оюуны өмчийг эзэмшиж, өмчлөхөөс татгалзсан тохиолдолд захиалагч эзэмших эрхтэй.

5.5. Улсын төсвийн санхүүжилтээр гүйцэтгэсэн эрдэм шинжилгээний ажлын үр дүнг эзэмшигч нь өндөр технологи, үндэсний инновацийг хөгжүүлэх асуудал эрхэлсэн төрийн захиргааны төв байгууллагын зөвшөөрөлгүйгээр оюуны өмчийг ашиглан гадаад улсад үйлдвэрлэл, үйлчилгээ явуулсан бол төрийн захиргааны төв байгууллагаас оюуны өмчийг эзэмшигчийн хууль бусаар олсон орлогыг хурааж, улсын орлого болгох, оюуны өмч эзэмших эрхийг түдгэлзүүлэн дараагийн эзэмшигчид шилжүүлэх саналыг оюуны өмчийн байгууллагад хүргүүлж шийдвэрлүүлнэ.



Зургаа. Оюуны өмчийг ашиглах нөхцөл

6.1. Оюуны өмчийг эзэмшигч нь оюуны өмчийг холбогдох патент, гэрчилгээ олгогдсоноос хойш 3 жилийн дотор дараах хэлбэрээр ашиглаж болно:

6.1.1. оюуны өмчийг зориулалтын дагуу ашигласны үр дүнд бий болсон үр шимийг олж авах, худалдах, түүнийг эзэмших эрхээ шилжүүлэх;

6.1.2. оюуны өмчийг лицензийн гэрээгээр бусдад ашиглуулах;

6.1.3. үйлдвэрлэл, үйлчилгээнд нэвтрүүлэх, эсхүл түүнд тулгуурлан гарааны компани байгуулах;

6.1.4. оюуны бүтээлийн өртөг тооцсон үнэлгээг Патентийн тухай хуулийн 21.2-т заасны дагуу хэрэглэх.

6.2. Энэ журмын 6.1-д заасны дагуу оюуны өмчийг эзэмшигч нь эрдэм шинжилгээний байгууллага бөгөөд зохиогч, судлаач болон эрдэм шинжилгээний байгууллагаас бусад хуулийн этгээд лицензээр эзэмшсэн тохиолдолд түүнд гэрээний үндсэн дээр роялти төлнө.

6.3. Гүйцэтгэгчийн эзэмшиж байгаа оюуны өмчийг захиалагч нь ашиглах тохиолдолд гэрээний үндсэн дээр зохих төлбөр төлнө.

6.4. Төрийн өмчийн оюуны өмчийг иргэн, аж ахуйн нэгжид эзэмшүүлж, ашиглуулах тохиолдолд тухайн иргэн, аж ахуйн нэгж роялти төлнө. Роялтийн хувь, хэмжээ нь тухайн оюуны өмчийг ашигласнаас олох орлогын 2-оос дээшгүй хувь байх бөгөөд орлогыг Шинжлэх ухаан, технологийн санд төвлөрүүлнэ.

6.5. Энэ журмын 6.2, 6.3, 6.9-т заасан төлбөр, роялтийн хэмжээг талууд гэрээгээр тохиролцоно.

6.6. Шинжлэх ухаан, технологийн асуудал эрхэлсэн төрийн захиргааны төв байгууллага нь энэхүү журмын 6.1-д заасан үүргээ биелүүлээгүй оюуны өмч эзэмшигчийн оюуны өмчийг албадан лицензээр ашиглуулах тухай хүсэлтээ Патентийн тухай хуулийн 20.1.2-т заасны дагуу оюуны өмчийн байгууллагад гаргаж шийдвэрлүүлнэ.

6.7. Улсын төсвийн санхүүжилтээр гүйцэтгэсэн эрдэм шинжилгээний ажлын үр дүнд бий болсон оюуны өмчийг ашиглан гадаад улсад үйлдвэрлэл, үйлчилгээ явуулах тохиолдолд өндөр технологи,



үндэсний инновацийг хөгжүүлэх асуудал эрхэлсэн төрийн захиргааны төв байгууллагаас зөвшөөрөл авах бөгөөд зөвшөөрөлгүй үйл ажиллагаа эрхлэхийг хориглоно.

6.8. Оюуны өмчийг ашиглан гадаад улсад үйлдвэрлэл, үйлчилгээ явуулахдаа тухайн улсад уг оюуны өмчийн эрхийг баталгаажуулж, хамгаалах арга хэмжээ авсан байна.

6.9. Онцгой нөхцөл байдал үүсэх үед болон үндэсний эрх ашгийг хангах зорилгоор Засгийн газар оюуны өмчийг Инновацийн тухай хуулийн 27.9-т заасны дагуу ашиглах эрхтэй байна.

Долоо. Оюуны өмчийн ашиглалтаас олсон орлогыг захиран зарцуулах

7.1. Эрх бүхий этгээд нь энэхүү журмын дагуу оюуны өмчийг ашигласнаас олсон төлбөр, роялтийн орлогыг Инновацийн тухай хуулийн 27.10-т заасны дагуу зарцуулна.

7.2. Энэ журмын 6.4-т заасан орлогыг шинжлэх ухаан, технологийн санд төвлөрүүлэн мөн журмын 7.1-д заасны дагуу зарцуулна.

7.3. Оюуны өмчийг Инновацийн тухай хуулийн 27.5-д заасны дагуу ашиглуулах тохиолдолд лиценз эзэмшигчээс авах роялтийн хэмжээг гэрээгээр тохиролцох бөгөөд судлаач, түүний ажилладаг танхим, лаборатори болон их сургууль, эрдэм шинжилгээний байгууллагад оногдох хувь, хэмжээг Патентын тухай хуулийн 16.9-т заасныг үндэслэн тогтооно.

7.4. Оюуны өмчийг төрийн өмчит үйлдвэрийн газар нэвтрүүлсэн тохиолдолд олох роялтийн орлого нь Патентын тухай хуулийн 16.10-т заасны дагуу зохицуулагдах бөгөөд судлаач, түүний ажилладаг танхим, лаборатори болон их сургууль, эрдэм шинжилгээний байгууллагад оногдох хувь, хэмжээг Патентын тухай хуулийн 16.9-т заасны дагуу тогтооно.

Найм. Бусад

8.1. Энэ журмын хэрэгжилтэд шинжлэх ухаан, технологийн асуудал эрхэлсэн төрийн захиргааны төв байгууллага хяналт тавина.

8.2. Шинжлэх ухаан, технологийн асуудал эрхэлсэн төрийн захиргааны төв байгууллага нь жил бүр эрдэм шинжилгээний байгууллагуудын оюуны өмчийн эзэмших, ашиглах байдалд үзлэг хийнэ.



8.3. Оюуны өмчийг эзэмшигч нь өөрийн эзэмшлийн оюуны өмчийн бүртгэл, ашиглалтын талаар жил бүр шинжлэх ухаан, технологийн асуудал эрхэлсэн төрийн захиргааны төв байгууллагад мэдээлнэ.

8.4. Оюуны өмчтэй холбогдон үүссэн маргааныг холбогдох хууль тогтоомж болон төслийн гэрээнд заасны дагуу шийдвэрлэнэ. Хэрэв гомдол гаргагч энэхүү шийдвэрийг эс зөвшөөрвөл гомдлоо шүүхэд гаргана.

МОНГОЛ УЛСЫН ЗАСГИЙН ГАЗРЫН ТОГТООЛ

2015 оны 7 дугаар
сарын 20-ны өдөр

Дугаар 298

Улаанбаатар
хот

Стратеги батлах тухай

Шинжлэх ухаан, технологийн тухай хуулийн 6.1.4, Инновацийн тухай хуулийн 6.1.4-т заасныг тус тус үндэслэн Монгол Улсын Засгийн газраас ТОГТООХ нь:

1. “Оюуны өмчийн тогтолцоог хөгжүүлэх үндэсний стратеги”-ийг хавсралт ёсоор баталсугай.

2. Оюуны өмчийн тогтолцоог хөгжүүлэх үндэсний стратегийг хэрэгжүүлэх арга хэмжээний төлөвлөгөөг баталж, салбар хоорондын уялдаа, хамтын ажиллагааг зохицуулан хэрэгжилтийг зохион байгуулж ажиллахыг Монгол Улсын Шадар сайд У.Хүрэлсүхэд үүрэг болгосугай.

3. Үндэсний стратегийг хэрэгжүүлэх арга хэмжээг Монгол Улсын эдийн засаг, нийгмийг хөгжүүлэх Үндсэн чиглэлд, шаардагдах хөрөнгийг жил бүрийн улсын төсөвт тусгаж, гадаад, дотоодын хөрөнгө оруулалтыг татах чиглэлээр ажиллахыг Монгол Улсын Шадар сайд У.Хүрэлсүх, Сангийн сайд Ж.Эрдэнэбат нарт үүрэг болгосугай.

**МОНГОЛ УЛСЫН
ЕРӨНХИЙ САЙД**

Ч.САЙХАНБИЛЭГ

**МОНГОЛ УЛСЫН
ШАДАР САЙД**

У.ХҮРЭЛСҮХ



Засгийн газрын 2015 оны 298 дугаар
тогтоолын хавсралт

ОЮУНЫ ӨМЧИЙН ТОГТОЛЦООГ ХӨГЖҮҮЛЭХ ҮНДЭСНИЙ СТРАТЕГИ

Нэг. Оюуны өмчийн тогтолцоог хөгжүүлэх
үндэслэл, шаардлага

Мэдлэгт суурилсан эдийн засгийг бий болгож, оюуны бүтээлийг зах зээлийн эргэлтэд оруулах нөхцөлийг бүрдүүлэхэд юуны өмнө бүтээл туурвих, шинийг санаачлах үйл ажиллагааны эрх зүйн орчныг боловсронгуй болгож, оюуны өмчийн тогтолцоог хөгжүүлэх шаардлагатай байна.

Дэлхийн өндөр хөгжилтэй орнууд оюуны өмчийг үндэсний өрсөлдөх чадварыг нэмэгдүүлэх хэрэгсэл, мэдлэгт суурилсан эдийн засгийн тулгын чулуу болгон ашигласан байдаг бөгөөд манай улс өрсөлдөх чадвараа нэмэгдүүлэхийн тулд “чанартай” патент, “хүчтэй” брэнд, соёл, урлагийн хосгүй бүтээл бүхий оюуны өмчийн тогтолцоог хөгжүүлэх нь зүйтэй байна. Мөн түүнчлэн оюуны өмчийн тогтолцоог хөгжүүлэх нь зөвхөн төрийн байгууллага, эсхүл оюуны өмчийн эрх эзэмшигчдэд хамааралтай бус, харин нийгэм, эдийн засгийн бүх салбарт хамаарах асуудал гэдгийг хүлээн зөвшөөрөх нийгмийн сэтгэл зүйг бүрдүүлэх шаардлагатай байна.

Иймд бүтээл туурвих, шинийг санаачлах үйл ажиллагааг дэмжих, оюуны өмчийг хамгаалах эрх зүйн орчныг боловсронгуй болгож, оюуны өмчийн ашиглалтыг нэмэгдүүлэх замаар оюуны өмчийн тогтолцоог Монгол Улсын хөгжлийн бодлого, шаардлагад нийцүүлэн цогцоор нь шинэчлэх зорилгоор Оюуны өмчийн тогтолцоог хөгжүүлэх үндэсний стратеги (цаашид “стратегийн” гэх)-ийг боловсруулав.

Хоёр. Стратегийн зорилго, зорилт

2.1. Стратегийн зорилго

Оюуны өмчийн тогтолцоог хөгжүүлэх үндэсний стратегийн зорилго нь иргэдийн бүтээл туурвих, шинийг санаачлах үйл ажиллагааг дэмжиж, оюуны өмчийг хамгаалах эрх зүйн орчныг боловсронгуй болгон оюуны өмчийн ашиглалтыг нэмэгдүүлэх замаар мэдлэгт суурилсан эдийн засгийг бий болгох, дэлхийн эдийн засагт эзлэх Монгол Улсын байр суурийг нэмэгдүүлэхэд оршино.



2.2. Стратегийн зорилгыг хэрэгжүүлэхийн тулд дараах зорилтыг дэвшүүлж байна:

2.2.1. оюуны өмчийн эрх зүйн орчныг Монгол Улсын хөгжлийн шаардлага, олон улсын чиг хандлагад нийцүүлэн боловсронгуй болгох;

2.2.2. бүтээл туурвих, шинийг санаачлах үйл ажиллагааг дэмжих тогтолцоог боловсронгуй болгох;

2.2.3. оюуны өмчийн ашиглалтыг нэмэгдүүлэн үйлдвэрлэлд нэвтрүүлэх, эдийн засгийн эргэлтэд оруулах нөхцөлийг бүрдүүлэх;

2.2.4. оюуны өмчийн мэдлэгийг нийтэд түгээн дэлгэрүүлж, оюуны өмчийн салбарын хүний нөөцийг хөгжүүлэх;

2.2.5. оюуны өмчийн эрхийг хамгаалах үйл ажиллагааны хүрээг өргөжүүлж, үр ашгийг нэмэгдүүлэх.

Гурав. Стратегийг хэрэгжүүлэхэд
баримтлах зарчим

3.1. Стратегийг хэрэгжүүлэхэд дараах зарчмыг баримтална:

3.1.1. оюуны өмчийн эрх эзэмшигч болон нийтийн ашиг сонирхлын тэнцвэрт байдлыг хангах;

3.1.2. оюуны өмчийн талаарх мэдээллийг нийтэд нээлттэй болгох арга хэмжээ авч, түүнийг шударгаар олж авах, ашиглах боломжийг бүрдүүлэх;

3.1.3. оюуны өмчийн харилцаа нь төрийн болон төрийн бус байгууллага, хувийн хэвшлийн гүншлэл, иргэдийн хамтын ажиллагаанд тулгуурласан байх;

3.1.4. хууль дээдлэх, нийгмийн ашиг сонирхол, ёс суртахуунд нийцсэн байх.



Дөрөв. Стратегийн зорилтыг хэрэгжүүлэх
үйл ажиллагаа

4.1. Оюуны өмчийн эрх зүйн орчныг Монгол Улсын хөгжлийн шаардлага, олон улсын чиг хандлагад нийцүүлэн боловсронгуй болгох чиглэлээр:

4.1.1. оюуны өмчийн тухай хууль тогтоомж, дүрэм, журмыг Монгол Улсын хөгжлийн шаардлага, олон улсын чиг хандлагад нийцүүлэх арга хэмжээ авч хэрэгжүүлэх;

4.1.2. уламжлалт мэдлэг, ардын урлагийн бүтээлийг бүртгэх, хамгаалах эрх зүйн зохицуулалтыг боловсронгуй болгох;

4.1.3. генетик нөөц болон түүнтэй холбоотой уламжлалт мэдлэгийг хадгалж хамгаалах, тэдгээрийг ашигласнаар бий болох үр ашгийг шударга хуваарилах эрх зүйн зохицуулалтыг боловсронгуй болгох;

4.1.4. соёл, урлагийн салбарт оюуны өмчийн талаар баримтлах бодлогыг боловсруулж хэрэгжүүлэх;

4.1.5. оюуны өмчийн хууль тогтоомжийн хэрэгжилтийг хангах арга хэмжээ авч, хяналт, шалгалтын үйл ажиллагааны үр нөлөөг дээшлүүлэх;

4.1.6. оюуны өмчийн салбарын гадаад харилцаа, хамтын ажиллагааг үр ашигтай хөгжүүлэх;

4.1.7. оюуны өмчид хамаарах асуудлыг Монгол Улсын хөгжлийн бодлого, шаардлагад нийцүүлэн тодорхойлон зохицуулах.

4.2. Бүтээл туурвих, шинийг санаачлах үйл ажиллагааг дэмжих тогтолцоог боловсронгуй болгох чиглэлээр:

4.2.1. оюуны өмч бий болгоход чиглэсэн их, дээд сургууль, коллеж, эрдэм шинжилгээний байгууллагын эрдэм шинжилгээ, судалгааны ажлыг дэмжих тогтолцоог бүрдүүлэх;

4.2.2. эрдэм шинжилгээ, судалгааны ажилд патентийн мэдээллийг ашиглах нийтлэг журмыг тогтоож нэвтрүүлэх;



4.2.3. ногоон оюуны өмч бий болгоход чиглэсэн санаачилга, үйл ажиллагааг дэмжих арга хэмжээ авч хэрэгжүүлэх;

4.2.4. жижиг, дунд болон хөнгөн, хүнд үйлдвэр, үйлчилгээний салбарт оюуны өмч бий болгох үйл ажиллагааг дэмжих тогтолцоог бүрдүүлэх;

4.2.5. соёл, урлагийн салбарт бүтээл туурвих үйл ажиллагааг дэмжих арга хэмжээ авч хэрэгжүүлэх;

4.2.6. шинийг санаачлагч, зохион бүтээгч, уран бүтээлчийг хөхиүлэн дэмжих, урамшуулах арга замыг боловсронгуй болгох.

4.3. Оюуны өмчийн ашиглалтыг нэмэгдүүлэн үйлдвэрлэлд нэвтрүүлэх, эдийн засгийн эргэлтэд оруулах нөхцөлийг бүрдүүлэх чиглэлээр:

4.3.1. ногоон оюуны өмчийг үйлдвэрлэлд нэвтрүүлж, эдийн засгийн эргэлтэд оруулах ажлыг хөхиүлэн дэмжих;

4.3.2. эдийн засгийн хувьд үр ашигтай оюуны өмчийг үйлдвэрлэлд нэвтрүүлэх, хамгаалах ажлыг дэмжих арга хэмжээ авах;

4.3.3. үндэсний болон орон нутгийн брэнд бий болгож хөгжүүлэх;

4.3.4. биет бус хөрөнгө болон оюуны өмчийг үнэлэх тогтолцоог бүрдүүлэх, бизнесийн үйл ажиллагаанд нэвтрүүлж хэвшүүлэх;

4.3.5. соёл, урлагийн салбарын бүтээл туурвигч, уран бүтээлчдийн эрхийг хамгаалах тогтолцоог бэхжүүлэх;

4.3.6. оюуны өмчийн лиценз, франчайзийн тогтолцоог боловсронгуй болгох.

4.4. Оюуны өмчийн мэдлэгийг нийтэд түгээн дэлгэрүүлэх, оюуны өмчийн салбарын хүний нөөцийг хөгжүүлэх чиглэлээр:

4.4.1. оюуны өмчийн мэдлэг олгох шаардлагатай зорилтот бүлгийг тодорхойлж, тэдгээрт чиглэсэн сургалтын хөтөлбөр, материал боловсруулах, сургалтад нэвтрүүлэх;



4.4.2. оюуны өмчийн мэдлэгийг түгээн дэлгэрүүлэх, сурталчлах зорилгоор хамтран ажиллах байгууллагуудын сүлжээг бий болгох, тэдгээрийн үйл ажиллагааг тогтворжуулах;

4.4.3. оюуны өмчийн салбарын хүний нөөцийн чадавхийг бэхжүүлэх;

4.4.4. бүх шатны боловсролын сургалтын байгууллагад оюуны өмчийн боловсролын хөтөлбөрийг нэвтрүүлэх;

4.4.5. бусдын оюуны өмчийг хүндлэх соёлыг нийтэд түгээн эзэмшүүлэх;

4.4.6. уламжлалт мэдлэг, ардын урлагийн бүтээлийг олон улсад тогтмол сурталчлан таниулах арга хэмжээ авч хэрэгжүүлэх.

4.5. Оюуны өмчийн эрхийг хамгаалах үйл ажиллагааны хүрээг өргөжүүлж, үр ашгийг нэмэгдүүлэх чиглэлээр:

4.5.1. оюуны өмчийн захиргааны удирдлага, бүртгэл, хяналт, хайлт, шүүлтийн үйл ажиллагаанд олон улсын стандартыг нэвтрүүлж, үр ашиг, чанарыг дээшлүүлэх арга хэмжээ авч хэрэгжүүлэх;

4.5.2. оюуны өмчийн статистик мэдээг олон улсын стандартын дагуу гаргах, Монгол Улсын албан ёсны статистик мэдээнд оруулан дүн шинжилгээ, судалгаа хийх, төлөвлөлт, бодлого боловсруулахад ашиглах тогтолцоог бүрдүүлэх;

4.5.3. оюуны өмчийн итгэмжлэгдсэн төлөөлөгчийн ажиллах журмыг боловсронгуй болгож, үр ашигтай ажиллах нөхцөлийг бүрдүүлэх;

4.5.4. Монгол Улсын шинэ бүтээлийн патентийн санг олон улсын патентийн хайлтын санд оруулж, дотоод, гадаадын хэрэглэгч ашиглах нөхцөлийг бүрдүүлэх;

4.5.5. оюуны өмчийн салбарт үйл ажиллагаа явуулж байгаа төрийн бус байгууллагуудтай үр ашигтай хамтран ажиллах нөхцөлийг бүрдүүлэх.



Тав. Стратегийн хэрэгжилтийг зохион
байгуулах, хянах

5.1. Оюуны өмчийн үндэсний зөвлөл (цаашид “Зөвлөл” гэх) болон оюуны өмчийн асуудал эрхэлсэн төрийн захиргааны байгууллага нь энэхүү стратегийн зорилт, үйл ажиллагааны хэрэгжилтийг зохион байгуулж, биелэлтэд нь хяналт тавьж ажиллана.

5.2. Зөвлөлийн ажиллах журам, бүрэлдэхүүнийг оюуны өмчийн асуудал эрхэлсэн Засгийн газрын гишүүн батална.

5.3. Зөвлөл нь ажлын явц, үр дүнгийн талаар оюуны өмчийн асуудал эрхэлсэн Засгийн газрын гишүүнд жил бүр тайлагнана.

5.4. Зөвлөлийн ажлын албаны үүргийг оюуны өмчийн асуудал эрхэлсэн төрийн захиргааны байгууллага гүйцэтгэнэ.

Зургаа. Хэрэгжүүлэх хугацаа

6.1. Стратегийг 2015-2018 онд хэрэгжүүлнэ.

Долоо. Санхүүжилт

7.1. Стратегийг хэрэгжүүлэхэд шаардагдах хөрөнгийг дараах эх үүсвэрээс бүрдүүлнэ:

7.1.1. улсын төсвийн хөрөнгө;

7.1.2. хандивлагч орон, олон улсын байгууллагын тусламж, хандив;

7.1.3. төрийн болон төрийн бус байгууллага, аж ахуйн нэгж, байгууллагын санаачилгаар хуримтлуулсан хөрөнгө;

7.1.4. гадаад, дотоодын хөрөнгө оруулалт;

7.1.5. хуулиар зөвшөөрсөн бусад хөрөнгө.

Найм. Хүрэх үр дүн, шалгуур үзүүлэлт

8.1. Стратегийг хэрэгжүүлснээр дараах үр дүнд хүрнэ:



8.1.1. оюуны өмчийн эрхийг хамгаалах зөв зохистой тогтолцоо бүрдэж, оюуны өмчийг хүндлэх соёл нэмэгдэнэ;

8.1.2. оюуны өмчийн эрх зүйн орчин боловсронгуй болсон байна;

8.1.3. ногоон оюуны өмч байгаль орчныг хамгаалахад хувь нэмэр оруулдаг болсон байна;

8.1.4. уламжлалт мэдлэг, ардын урлагийн бүтээлийг хамгаалах олон улсын чиг хандлагад нийцсэн эрх зүйн тогтолцоо бүрдэнэ;

8.1.5. оюуны өмчийг бий болгоход чиглэсэн их, дээд сургууль, коллеж, эрдэм шинжилгээ, судалгааны байгууллага, эрдэмтэн, судлаачдын эрдэм шинжилгээ, судалгааны ажлын тоо хэмжээ, чанар нэмэгдэнэ;

8.1.6. жижиг, дунд болон хөнгөн, хүнд үйлдвэр, үйлчилгээний салбарын шинийг санаачлагч, зохион бүтээгчид шинийг санаачлах, оюуны өмчийг ашиглах, үйлдвэрлэлд нэвтрүүлэх, эдийн засгийн эргэлтэд оруулах таатай орчин бүрдэнэ;

8.1.7. соёл, урлагийн салбарт бүтээл туурвих таатай нөхцөл бүрдэнэ;

8.1.8. оюуны өмчийн талаарх олон нийтийн мэдлэг, боловсрол дээшилж, оюуны өмчийг хүндлэх соёл нэвтэрнэ;

8.1.9. оюуны өмчийн эрхийг хамгаалах үйл ажиллагааны үр нөлөө нэмэгдсэн байна;

8.1.10. төрийн болон төрийн бус байгууллага, шинжлэх ухааны байгууллага, хувийн хэвшлийн харилцан ашигтай, үр дүнтэй түншлэл, хамтын ажиллагаа бий болж хөгжсөн байна.

8.2. Стратегийн үр дүнг дараах шалгуур үзүүлэлтээр хэмжинэ:

8.2.1. олон улсын жишигт нийцсэн оюуны өмчийн талаар баримтлах чиг хандлага, нэгдсэн бодлого тодорхойлогдсон байх;



8.2.2. шинээр батлагдсан болон нэмэлт, өөрчлөлт оруулж батлуулсан оюуны өмчид хамаарах эрх зүйн баримт бичиг, түүний хэрэгжилт, үр нөлөө;

8.2.3. байгаль орчинд ээлтэй, эрхийн хамгаалалт хийгдсэн болон үйлдвэрлэлд нэвтрүүлсэн ногоон оюуны өмчийн тоо;

8.2.4. ардын урлагийн бүтээл, уламжлалт мэдлэг, технологийг ашиглах, тэдгээрийн үр ашгийг шударга хуваарилах эрх зүйн зохицуулалт бий болсон байх;

8.2.5. их, дээд сургууль, коллеж, эрдэм шинжилгээ, судалгааны байгууллага дахь патентийн мэдээллийн ашиглалт, эрдэм шинжилгээ, судалгааны ажлын тоо (өмнөх жилүүдээс өссөн байх);

8.2.6. үйлдвэрлэлд нэвтрүүлж, эдийн засгийн эргэлтэд оруулсан оюуны өмчид хамаарах бүтээл болон лиценз, франчайзийн тоо (өмнөх жилүүдээс өссөн байх);

8.2.7. соёл, урлагийн салбарын хамтын удирдлагын байгууллагуудын үйл ажиллагаа олон улсын жишигт хүрсэн байх;

8.2.8. оюуны өмчийн чиглэлээр зохион байгуулсан сургалт, сурталчилгаа, олон нийтийн арга хэмжээ, тэдгээрт хамрагдсан байгууллага, хүний тоо, оюуны өмчийн сургалт, боловсролд зориулан боловсруулсан сургалтын хөтөлбөр, материалын тоо;

8.2.9. оюуны өмчийн эрхийн хамгаалалт хүссэн мэдүүлгийн тоо (өмнөх жилүүдээс өсч чанартай болсон байх);

8.2.10. их, дээд сургууль, коллеж, эрдэм шинжилгээний байгууллагуудын дэргэд технологийн инновацийг дэмжих төвүүдийн сүлжээ бий болсон байх.

Ес. Хяналт-шинжилгээ, үнэлгээ

9.1. Оюуны өмчийн асуудал эрхэлсэн төрийн захиргааны байгууллага нь стратегийн зорилт, үйл ажиллагааны хэрэгжилтийн явц, үр дүнд жил бүр хяналт-шинжилгээ, үнэлгээ хийнэ.



9.2. Оюуны өмчийн асуудал эрхэлсэн төрийн захиргааны байгууллага нь стратегийн зорилт, үйл ажиллагааны хэрэгжилтийн явц, үр дүнд хийсэн хяналт-шинжилгээ, үнэлгээний тайланг жил бүрийн эхний улиралд багтаан Засгийн газарт танилцуулж байна.

9.3. Стратегийн хэрэгжилтэд тухайн чиглэлээр үйл ажиллагаа явуулдаг, туршлага, чадавх бүхий төрийн бус байгууллагаар хяналт-шинжилгээ, үнэлгээ хийлгэж болно.

Хаяг:

“Төрийн мэдээлэл” эмхэтгэлийн редакци.
Улаанбаатар-14201, Төрийн ордон 124 тоот
И-мэйл: turiin_medecelel@parliament.mn

Утас: 262420

Хэвлэлийн хуудас: 1

Индекс: 14003